

摘藻堂四庫全書薈要

史部

欽定四庫全書薈要

史部

御批續資治通鑑綱目卷二十六

詳校官編修 臣汪鏞



欽定四庫全書蒼要卷八千四百十一史部

御批續資治通鑑綱目卷二十六

起庚午元文宗至順元年盡
壬辰元順帝至正十二年 凡二十三年

宗皇帝至順元年春二月立明宗子伊埒哲伯為



發明 文宗殺兄而奪之國徒以封其幼子為王之
日不亦晚乎雖然此蓋天理萌動之機有不
可得而泯沒者耳宋太祖篡周之國則命子孫世
襲崇義公元文宗篡兄之位則其子為廊王是皆
其真情難掩非納交要譽之心也身為天子而使
凡之子孫賤處下僚又豈無惻隱警惕之心哉故

綱目特書於策所
以予其能悔乎

以鄂博雅哈為平章政事○平章政事多爾濟以有罪

免

臺臣言其紊亂銓
選貪污著聞耳

以巴延知樞密院事罷制左丞相

以雅克特穆爾有大功欲獨相以尊異之乃詔諭中
書省曰昔世祖嘗以宰相一人總領庶務故政治出
於一雅克特穆爾為右丞相巴延
知樞密院事左丞相其復勿置

三月雲南諸王圖沁反遣豫王喇特納實哩替諸將往

討之

圖沁及萬戶布呼阿哈等叛攻陷中慶路殺廉訪司官尋自稱雲南王以布呼阿哈為丞相阿哈等為平章等官立城柵焚倉庫以拒命詔以奇珠為雲南平章政事特穆爾布哈為雲南左丞相及中尚卿燕爾約蘇從喇寶納寶

哩由八番進討之

夏四月饑○皇后鴻吉哩氏殺明宗皇后班布爾寶

皇后與宦者拜珠謀殺之

發明

夫者妻之表率君者臣之模範上行下效揆於影響此理之必然也文宗既殺其兄皇后

復殺其嫂文宗隱忍縱以殺之者蓋由已不能正所以不能正其妻使明宗夫妻無故而俱殺然則

文宗夫妻豈不忍心害理者乎故綱目直書皇后殺明宗皇后所以明其敵體而不可擅殺之意著矣

廣義

鴻吉哩氏得以殺明宗后者效攀於文宗也文宗之貽毒可勝言哉

五月帝如上都○以伊拉齊為平章政事○殺知樞密院庫春貝托克托穆爾等十二人籍其家

庫春貝托克托穆爾通政使濟爾噶朗以雅特克穆爾權勢崇重欲謀誅之貝特密實托密以變告按問並棄市籍其家

發明

凡處於昏亂之朝鮮有得其死者以庫春貝托克托穆爾等善事其君獻可替否亦且不

保其終則其餘可知矣是時雅克特爾誣證以其罪而文宗按問既皆棄市又籍其家政刑若此君臣俱任其責此固綱目書殺而不去其官之意也

雲南宣慰使祿余等叛附於圖沁詔遣諸王溫都遜特穆爾會諸路兵進討之

初雲南宣慰使土官祿余以討圖沁之功授行省參知政事至是叛附於圖沁羅羅諸蠻因相繼作亂平章特穆爾布哈被害詔王溫都遜特穆爾將江浙河南江西三省兵二萬與湖廣省臣托崱等並討之

將作院使索珠等有罪誅

特們德爾子索珠觀音努塔伊將哈雅坐怨望造符籙咒詛事連刑部尚書烏納爾前御史大夫博囉上

都留守烏訥
爾俱伏誅

發明

孟子曰君子之澤五世而斬小人之澤亦五世而斬特們德爾奸邪娛圖而索珠乃其嫡

子漸染父惡固非一日而流風餘韻尚有存者安可使之食祿於朝乎既而以符錄咒詛大肆恣望然後從而行之不亦晚乎此蓋欺罔天下之通患必待徵於色發於聲然後喻耳綱目特書伏誅所以正其誣罔之罪

秋閏七月趙世賢罷

御史葛明誠言世延年踰七十固為苟容請斥歸田里詔中書議雅克特穆爾言世延向陳致仕不允所請御史之言而不知有旨也帝曰如御史言世延固難任中書矣其仍任以翰林奎章之職

詔加孔子父母及顏回曾參孔伋孟軻程顥程頤封爵

孔子父叔梁紇為啟聖王母顏氏啟聖王夫人而顏子
克國復聖公曾子邾國宗聖公子思沂國述聖公孟
子鄒國亞聖公程顥
豫國公程頤洛國公

江南大水

江浙湖廣尤甚沒民田五萬一
百八十頃民饑者四十餘萬戶

八月帝還大都○大寧地震○始親視南郊

帝始服大裘袞冕親祀昊天上帝於南郊以太祖配
享蓋自世祖至是凡七世而南郊親祀之禮始克舉
焉

廣義

書曰始者以見前此皆使人攝之也嗚呼元人於天且漫之况其他乎特書於冊所以表

文宗為鐵中錚錚鏞中皎皎者也

冬十一月詔以漢董仲舒從祀孔子廟

位列七十
二子下

發明

書曰佑賢輔道顯忠遂良兼弱攻昧取亂侮亡推亡固存邦乃其昌文帝紛紛制作未皆

合禮獨從儒一事深合事宜如前書詔加孔子父母及顏回曾參孔伋孟軻程顥程頤封爵此書詔以董仲舒從祀孔子廟此皆佑賢輔德顯忠遂良之深意也綱目特書亦所以不沒其善政云爾

廣義

是年七月既加先聖父母諸賢之爵至是又詔仲舒從祀孔子廟何其兩舉皆德其當哉

使無奉佛之非則
文宗庶乎其得失

立燕王喇特納達喇為太子

未^卒二年春正月太子喇特納達喇卒○二月初立廣教

總管府

凡十六所以掌天下僧尼之政秩正三品府
設達嚕齊總管同知府事判官各選一員

以巴咱爾為平事政事○三月司徒錫沙陳符讖

錫沙言陶弘景胡笳曲有負宸飛天歷終是甲辰君
之詔暗合陛下生年紀號實受命之符乞錄付史館
頒示中外詔翰林集賢諸儒臣議咸以謂唐開元間
薛謙進武后鼎銘云上天降鑑方建隆基為玄宗受

命之符姚崇表賀司馬光言其采偶就之文以為符瑞此小臣之誦而宰相實之是侮其君也今弘景之曲雖於生年紀號若偶合者然陛下應天順人紹隆正統無待於傍引曲說以為符命從其所其恐啟讖緯之端非所以

宋民志也事遂寢

發明

臨之六三曰甘臨無攸利既憂之無咎朱子曰陰柔不中正而居下之上為以甘說臨人之象其占固無所利然能憂而改之則無咎朱子人選善為最深矣蓋仁臣莫然於引君於正莫正善於逢君於邪司徒之職非小矣而乃以符讖上之是為逢君於惡不祥莫甚於此矣豈非甘說臨人之意乎甘說臨人徒為失已則亦何益之有哉據事直書其義自見

廣義

文宗聰諫符讖之非宋之真宗殆不如也

浙西水旱

諸路饑民八十餘萬戶

夏四月武陟地震

逾月不止

遣喇特納實哩等畧定雲南引兵還

喇特納實哩及各省兵十餘萬衆擒布呼阿哈喇新之烏蒙東川諸夷皆款服遂復中慶路遣使獻捷言叛者或誅或降雖已畧定餘黨逃竄山谷不能必其不反則乞分兵鎮遏之餘皆遣還詔從之

五月帝如上都○六月翰林學士吳澄卒

澄泰延閣謝病歸臨川四方從學者恒數百人著書
至將終不輟有易春秋禮記纂言及校定皇極經世
書大戴禮等書卒贈
臨川郡公諡文正

發明

吳澄潛心好學篤志力行著書立言羽翼吾
道誠當代之大儒也故卒而具官以深予之

廣義

澄居亂世而未嘗辱已其周於德者歟
綱目於其卒而月之者重其作人也

秋七月封巴延為浚寧王○八月朔日食○帝還大都

江浙水

壞田十八萬八千
七百三十八頃

詔皇子古魯達喇出居雅克特穆爾家

更名雅克
特古斯

九月祿余復寇雲南冬十月都元帥齊喇擊走之

祿余既竄伏尋出收合餘黨列行營六十所復作亂
寇順元等路雲南省臣遣都事諾海往招之遇害既
而蒙古都元帥齊喇潛師擊破賊砦殺五百餘人圖
心之弟必里克圖庫齊舉家皆死獲圖沁弟二人之
三人誅之祿遁
去餘黨悉平

十一月朔日食○詔養雅克特穆爾子塔喇海為子

賜居第
贖產

發明

前書詔皇子出居雅克穆爾家此書養雅
克特穆爾之子為子其輕重倒置而紀綱為

之大秦矣安有已之子出居於外而人之子反養於內乎文宗知雅克特穆爾助已之功而不知其所以敗壞國家之故知有奸臣而不知有公法也嗚呼一渠死不能翦芟不惟官之抑且寵之尚烏足與論人道哉合前後之書法觀之則其深疾當時切矣

壬申三年夏四月諸王伊魯特穆爾謀伏誅

安西王阿南達子之伊魯特穆爾與輝和爾裕勒珍達實班第實班第必刺特納實哩沙津阿古齊謀不執事覺皆伏誅

五月帝如上都○禁加封淫祠

太常博士王瓚言諸路請加封神廟濫及淫祠按禮經以勞定國以死勤事能禦大災能捍大患則祀之

其非祀典之神
自後不許從之

廣義

淫祠盡惑民志固所當禁然止禁其加封亦不能毀未為得也王瓚按禮經以勞定國以

死勤事能禦大災能捍大患則祀之非祀典之神不許可謂明矣不知西方佛教曾以勞定國乎曾以死勤事乎能禦大災能捍大患乎此四者無一能之而當時崇奉之極者莫佛為甚王瓚能言此死勤事而彼者何其明於此而暗於彼邪不然瓚必受其惑惑而與之俱也或者不敢非上所好而枯槩以保其位焉三者有其一臣不知其所見矣

雲南餓

詔蠲本省
田租三年

六月嚴起復之禁

監察御史陳思謙言內外官非文武全才出處繫天下安危能極金革之難者不許奪情起復從之時思謙又言銓衡之弊入仕之門太多黜陟之法太簡州郡之任太淹朝省之除太速欲設三策以救四弊一曰至元三十年以後增設衙門冗濫不急者從實減并其外有選法者并入中書二曰宜參酌古制設辟舉之科名三品以下各舉所知得材則受賞失實則受罰三曰古者刺史入為三公郎官出宰百里蓋使外職職朝廷治體內官知民間利病今後歷縣尹有能聲善政事受郎官御史歷郡守有奇才異績者任憲使尚書其餘各驗簡品通選在內者不得三考連任京官在者者須歷兩任乃遷內職續非出類守不敗官者則備以年勞處常以調凡朝缺官員須十二月之上方許遷除帝可其奏命中書議行之○河北

道廉訪使僧嘉努言自古求忠臣於孝子之門今官於朝十年不省親者有之非無思親之心也由朝廷無給假省親之制而有擅離官次之禁古律諸職官父母在三百里外三年聽一給定省假二十日親不存者聽一給拜墓假二十日以此推之父母在三百里以至萬宜計道里遠近定立段期其應省親匿不行者坐以罪若詐冒有所規避者與詐奔喪者同科詔廷臣議行之

發明

書曰德日新萬邦惟懷志自滿九族乃離文宗因人言而嚴起復之禁可謂能日新其德

而非志自滿者比矣蓋奪情非令典起復非美名三年之喪古今通義奪情而起何義之有此固金革之變禮又豈可施於平日乎文宗既納臣言則命禁止亦庶幾有從善之心矣故特揭而書之

廣義

分註載陳思謙僧嘉努之言可謂探本之論矣文宗行之亦其時政之一得也君子幸焉

錄用托多王士熙托歡等○秋八月京師隴西地震

發明

自至順至是才三年而紛紛災異史不絕之書夏四月饑江南大水大寧地震浙西水旱武

陟地震江浙水十一月朔日食雲南饑至是而又
有京師隴西地震下又書地震則其災異之多未
有甚於此時者也當時元之君臣曾未見其脩省
恐懼之實而乃視為無知漠然不悟迨至於亡身
而後已豈不深可惜哉綱目詳書而不
不副以為後世不重天慶之大戒耳

帝崩於上都

廟號文宗國語稱

曰濟雅圖皇帝

九月地震○冬十月廊王伊呼哲伯即位

王明宗第二子留居京師帝崩雅克特穆爾請皇后立皇子雅克特古斯后不從立王氏年七歲百司庶務咸啟皇后取進止

以薩提為平章政事○十一月尊皇后為皇太后○廊

王薨

廟號寧宗○王諱曰寧宗之立雖母后權臣利於立幼柳文宗顧命舍其子而立兄子是不可謂非公天下之心也然終不足以掩其哉兄之惡人心天理可畏懼哉

太后遣右丞奇爾濟蘓迎托歡特穆爾於靜江

初太祖取西北諸國阿爾斯蘭率眾來降乃封為郡王明宗居沙漠納其裔孫南富魯氏之女曰瑪勒岱

生托歡特穆爾至順初明宗后遇害遂徙之高麗使
居大青島中尋詔天下言明宗在時素謂非其子移
於廣西之靜江廊王薨雅克特穆爾謂立雅克特斯
太后曰吾子尚幼托歡特穆爾在廣西今年十三矣
且明宗長子於理當立
乃遣奇爾濟撫往迎之

廣義

柳觀太后者乃鴻吉哩氏即文宗之后也向
嘗殺明宗之后班布爾實後遵文宗顧命舍

己子以立廊王廊王既薨而已子雖幼在他后孰
不欲立己子而得以專權聽政邪后則不然觀其
言曰吾子尚幼托歡特穆爾在廣西今年十三矣
且明宗長子於理當立斯言也何其公平廣大之
若是耶吁以善言而出於惡人
之口曾謂天理民彝之可泯乎

癸酉

四年

順帝元年

春三月雅克特穆爾死

雅克特穆爾秉權以來肆行無忌一宴或宰十三馬
取恭定后為夫人前後尚宗室女四十人有交禮三
日遽遣歸者後房充斥不能盡識一日宴趙世延宅
男女立坐見坐隅一婦甚麗意欲與俱歸顧左右曰
此為誰對曰太師家人也自
後荒淫日甚體羸弱血而死

發明

蠻夷書死盜賊書死雅克特穆爾臣也曷為
以死書貶絕之詞也文宗篡國殺兄賊也雅

克特穆爾為之謀主是亦賊馬耳夫以亂臣賊子
生既免於刑戮死而不加貶絕則是正邪錯亂賢
否混淆不過為元史之舊文耳烏足謂之綱目哉
惟其善惡公而予奪正此綱目之所以為綱目非
君子莫
能修之

廣義

君子曰卒小人曰死雅克特穆爾太師之
尊細目去其官而書曰死者小人之也

夏五月京師地震○六月托歡特穆爾即位於上都

初托歡特穆爾至自靜江百官具鹵簿迎於良鄉雅克特穆爾既見並馬徐行具陳迎立意托歡特穆爾幼且畏之一無所答雅克特穆爾疑其意不測故至京久不得立適太史亦言其立天下則亂用是議未能決遷延者數月至雅悅特穆爾死皇太后乃與大臣定議立之約後當傳於雅克特古斯若武宗仁宗故事

以巴延為太師右丞相薩敦為太傅左丞相

時有阿勒呼木特穆爾明宗親臣也言於帝曰天下事宜委宰相決之庶可責其成功若躬自聽斷不負惡名帝然之由是深居室中逸樂每事決於宰相而已無所專焉

廣義

昔臯陶戒舜曰一日二日萬幾蓋言一日二日之間事幾之來且至萬焉厥後臯陶雖曰

萬事叢勝而舜則曰勅天之命惟時惟幾蓋言無時無事而不戒勅也迨至文王於庶言庶獄庶慎獨於庶言而不曰罔敢知者以號令出於君不得辭其責也嗚呼舜豈惡逸樂而好勤勞哉恐負上天之托故也厥後周公作無逸以戒成王然其皆出於此與今順帝以阿勒呼木特穆爾之言遂高枕深宮付天下於相忘而一聽宰相處分與二世之任趙高無異信乎亡國之胎於此矣孔子曰一言可以喪邦此之謂也

大霖雨

京畿水平地丈餘

畿民四十餘萬

江淮旱饑○秋八月立皇后巴約特氏

后雅克特禡爾之女也

奎章閣侍書學士虞集謝病歸

初御史中丞馬祖常求集薦引其鄉人龔伯璉集固不從祖常不悅帝之將立也台諸老臣赴上都集亦與焉祖常使人告集曰御史有言矣蓋以文宗嘗命集書詔言帝非明宗子故帝常以是調集使去集乃謝病歸臨川集既去侍臣有以舊詔言者帝不懌曰此我家事豈由彼書生邪尋遣使賜酒幣召還禁林會疾作竟不至

發明

凡書以疾免實也謝病歸托也書奎章閣侍書學士虞集謝病歸病帝也終綱目書謝病歸

三皆不得已而托之者也。集因馬祖帝所托遂謝病歸。當時之輕是官可知矣。嗚呼！君子之於小人，勢猶冰炭，每每相反。然而始終不屈於小人者，君子之全節也。始終欲陷乎君子者，小人之邪心也。然則君子托於小人而不能全其志，則豈不致其事而去哉？綱目書此，其不滿當時之意深矣。

廣義

綱目於虞集書其官書謝病歸者，未其見幾明決也。

冬十月封薩敦榮王騰吉斯襲封太平王。○十一月封巴延為秦王。是日秦州山崩地裂。

發明

書是日何應之速也。上書封巴延為秦王，下書秦州山崩地裂，則巴延之穢惡著矣。天意

之垂戒昭矣。夫以巴延奸邪小人，不宜大用。然元不顧其是非，而概以王爵加之，不亦過乎？然甫封秦

王山崩地裂則巴延惡德見絕於天而變應之感
捷於影響耳他日養成亂階敗壞天下誰實尸之
元人但知有巴延而不知有天下遂使奸宄之徒
輾轉得志病國妨賢由辨之不早辨也綱目書此
不再貶而其義自見者此類是矣

廣義

秦州山崩地裂於封巴延之日所以兆
其弒后殺王之虐也天道之驗可畏哉

甲戌 順帝元統二年春正月汴梁雨血

著衣
皆赤

鄂博哈雅罷以圖卜台為平章政事○三月天雨毛

彰德路天雨毛如線而線民謠云
天雨線民起怨中原地事必變

發明

為異也董子曰國家將有失道之敗而天乃

出災異以譴告之不知自省又出怪異以警懼之
尚不知變而敗傷乃至此見天心仁愛人君而欲
止其亂也惜其以災為玩不知恐而所謂上天之
告戒者視為氣數之末而不求所以彌災之道是
以日積月累天怒民怨而不至於亡不
止也嗚呼天之告戒豈虛謬云乎哉

水旱疫民饑

時山東大水浙西水旱疾
疫饑民至五十七萬戶

夏四月朔日食○錄許衡後○帝如上都○五月薩敦
罷六月復以為左丞相

命薩敦仍商量中書省事騰吉斯為左丞相
既而騰吉斯辭不拜遂復命薩敦為之尋卒

秋八月赦是日京師地震鷄鳴山崩

以湖廣河南自三月不雨至於是月及諸路旱蝗民
饑太白屢晝見經天大赦下天是日京師地震鷄鳴
山崩臨為池方
百里人死者衆

發明

朱子曰言非俱日食而已而雷霆山崩水溢
亦災異之甚者是宜恐懼修省改紀其政而

幽王曾莫之懲也蓋赦於是日而山崩地裂亦見
於是日則是順帝之德有以見絕於天焉耳使其
自此警省日日新又日新於以消天慶而回人心
則庶乎其可也夫何敗德棄禮日淪污下而天下
自此多事矣豈不深可惜哉
綱目特謹而書之垂訓大矣

廣義

抑觀去年順帝將即位夏五月京師地震既即位而六月京畿大霖雨江淮旱饑秦州山

崩地裂今年春正月汴梁雨血三月天雨毛水旱疫民饑夏四月朔日食至此又京畿地震雞鳴小山崩嗚呼人君即位之初而災變之多者未有順於順帝也雖欲不亡得乎

帝還大都○冬十月始以珍格皇后配饗武宗

時議三朝皇后升祔未決巴延以聞太常博士達魯曾曰先朝既以珍格皇后無子不為立主今所當立者明宗母邪文宗母邪對曰珍格皇后在武宗朝已膺寶冊則文明二母皆妾今以無子之故不得立主而以妾母為臣是為臣而廢其先君之母為子而私尊其先父之妾宜可復蹈慕容之失乎集賢學士陳顥素疾魯曾乃曰唐太宗冊曹皇母為后亦二后也奚為不可魯曾曰堯母帝嘗庶妃堯未嘗以配饗

不法堯舜而法唐太宗郊祭服其議而巴延亦
是之遂以珍格皇后配武宗擢魯曾為御史

發明

珍格之事舉朝無一敢言者獨逮魯曾正色
爭之至是復伸前議僅得侑祀故綱目特書

其始以志之亦所以著蒙蔽者之罪也珍格武宗
之正后元人以無子之故不為立王而反欲以妾
母為正名實紊矣今魯曾一言后乃配享是乃勇
於為義者耳由是正妾之分定而名於是乎正馬
如唐書始以懿安皇后醇享憲
宗大同而小異學者試思之

黃義

此舉
得矣

詔舉才堪守令者

命臺憲部官各舉才堪
任守令者一人以名聞

乙亥 至元元年春二月帝畋柳林不果行

帝將田於柳林御史臺臣諫曰陛下春秋鼎盛宜思
文皇付托之重致天下於平隆今赤縣之民供給繁
勞農務方興而馳驅冰雪之地儻
有衝厥之憂奈宗廟社稷何遂止

三月罷采高麗媵女

臺臣言高麗首郊臣節而近年屢遣人往取
媵女至使生女不舉女長不嫁乞禁止從之

夏五月帝如上都○六月騰吉斯反伏誅秋七月巴延
弒皇后巴約特民

時薩敦已死巴延獨秉政騰吉期曰天下本我家天
下巴延何人而位吾上遂與其叔父句容郡王達朗

達賚潛蓄異心謀立諸王鴻和特穆爾帝數召達朗
達賚不至却王齊齊克圖發其謀六月晦騰吉斯伏
兵東郊率勇士突入宮巴延鄂勒哲特穆爾等掩捕
獲騰吉斯及其弟塔刺海誅之餘黨奔達哩達哩即
應之殺使者以禍旗帝遣阿巴往諭又殺之率其黨
和尚等逆戰敗走鴻和特穆爾所阿哩袞徹爾執送
都戮之鴻和特穆爾自殺初騰吉斯事敗被擒攀折
殿檻不肯出塔刺海走匿皇后座下后蔽之以衣左右
曳出斬之血濺后之衣巴延奏并執后后呼帝曰陛
下救我帝曰汝兄弟為逆豈能相救乃遷出宮巴延
尋殺之於
開平民舍

發

騰吉斯賁巴延之竊權榮廢立之私智稱兵
犯闕兇焰燎人其罪甚矣故書伏誅以正其

罪皇兵雖有衣蔽塔刺海之過然亦當正名其罪
揚於王庭奉天討以殺之巴延何人而擅執國母

以殺乎前史皆以殺為文綱目變文直書巴延殺
皇后畧無一毫假借然後誅亂討逆各得其所而
亂臣賊子假公以營私者則其罪始暴白天下耳
所以扶三綱立人極其旨嚴矣故曰綱目修亂臣
賊子
懼

廣義

嗚呼巴約特氏之見殺天其或者欲
假手巴延以報雅克特穆爾之惡乎

九月減宦者

御史臺臣言國初宦官不過數十人今內府執事不
下千餘乞依舊制裁減冗濫以廣仁愛之心者庶費
之患
從之

帝還大都○冬十一月以昂吉爾為平章政事○詔罷

科舉

初徹爾特穆爾為江浙平章會科舉驛請試官供張甚盛心頗不平及復入中書首議罷科舉及論學校莊田祖可給宿衛士衣糧動當國者以發其機又欲損太廟四祭為一於是御史呂思誠等列其罪狀劾之不報守辭職去而思誠出為廣西僉事時罷科舉詔已書而未用璽參政許有壬力爭之把延怒曰汝風臺臣言徹爾特穆爾邪有壬曰太師擢之徹爾特穆爾在中憲御史三十人不畏太師而聽其壬豈有壬權重於太師邪把延意稍解有壬乃曰科舉若罷天下人才失望也把延曰舉子多以職敗有壬曰科舉未行時臺中贓罰無算豈盡出於舉子把延曰舉子中可任用者惟參政爾有壬曰若張夢臣馬伯庸輩皆可任大事如歐陽玄之文章亦豈易及把延曰科舉雖罷士之欲求美衣食者自能向學有壬曰為士者

初不事衣食巴延曰科舉取人實妨選法有壬曰今
通事知印等天下凡三千三百餘名今歲自四月至
九月白身補官受宣者亦且七十三人而科舉一歲
僅三十餘人科舉於選法果相妨乎否也巴延心然
其言而議可定不可中輟乃溫言慰解之朔日宣詔
特令有壬為班首以折辱之有壬懼禍不敢辭治書
侍御史布哈誚有壬曰叅政可謂過橋
折橋者矣有壬以為大恥移疾不出

發明 嗚呼順帝是舉誠乖國體矣欲得實才莫過
科舉今既罷之則是當為而不為不當為而
為之紀綱由是大壞矣欲求天下之
不亂其可得哉特書曰罷蓋譏之也

廣義

自古治天下者恒慮遺才故設科舉以網羅
天下豪傑是以人才之得莫先於此於此而

罷之則元人之國可謂空虛矣譬猶百圍之
木而不內固者風得以仆之也而由乎風哉

詔改元

時星文屢示做帝以世祖皇帝在位長久欲祖述之詔改元統三年仍為至元元年監察御史李好文言年號襲舊於古未聞襲其名而不蹈其實未見有益因言時弊不如至元者十餘事不報

廣義

嗚呼元之順帝可謂不達於理者矣雖其年號如唐虞而德政不及唐虞其能免於敗亡乎

昔始皇以功過三皇德兼五帝且欲以一世二世傳之萬世然而仁義不施而暴虐日甚故止於二世而亡耳曾為三皇五帝有是哉今也上天示變正欲其修德改行夫何順帝德政不修反欲繼世祖之元以延國祚正猶大寒方至而加以絺綌曾何補於寒哉好文之言不亦當乎

十二月尊皇太后為太皇太后

初騰吉斯既誅帝詔天下有曰皇太后後其所生一
以至公為心親挈大寶異子兄弟功德隆盛近古罕
有命大臣議加禮典至是尊以為皇太后后許有壬
言皇上於太后母子也若加太皇太后則為孫矣且
今制封贈祖父母降父母一等蓋推恩之法近重而
遠輕今尊皇太后為太皇太后是推而遠之乃反輕
矣不從監察御史台哈布哈率同列奏言孀母不宜
加徽稱太后聞之怒欲殺言者衆懼台哈布哈曰此
自我發之甘受誅戮決不敢累諸公已而太后怒解
曰風憲有臣如此豈不能守祖宗之法乎命賜金幣
以旌其直

徹爾特穆爾有罪免徙南安

徹爾特穆爾指斥武宗又以妻弟女為已女冒請珠
袍等物於基臣復劾其罪而已廷亦惡其忤已遂流

於南安人是
皆快之尋卒

河決封丘

丙子二年春二月追尊生母瑪勒岱為皇后○夏四月以

特穆爾布哈為平章政事○帝如上都○秋八月朔日

食○九月帝還大都○是歲水旱蝗饑

鄧州大霖雨三十日滿河白河水大溢為災黃州蝗
江浙自春至八月不雨民大饑時江州諸縣民饑甚

總管王大中貸富室粟賑之而免其雜
役以為息期歲豐還其本民無病焉

丁丑三年春正月帝畋於柳林

凡三十五日御史綽台宋紹明進諫帝賜以金帛綽台等因辭帝曰昔魏徵進諫唐太宗未嘗不賞汝其受之

發明

從獸無厭謂之荒樂酒無厭謂之亡先王無流連之樂荒亡之行順帝前畋柳林聞諫不

果則庶幾有從善之心也至是直書畋於柳林三十五日是時災異頻仍政事多闕不思警惕而乃怠荒謂之何哉書曰惟彼陶唐有此冀方今失厥道亂其紀綱乃底滅亡順帝尊為天子富有四海觸日之前皆有可樂何必載駝載駝以效武人之為耶直書於策深貶之爾

廣東朱光御河南棒胡等兵起

光御增城縣人與其黨石昆山鍾大明聚眾反稱大金國改元赤符時惠州民聶秀卿等亦舉兵與光御

相結為亂棒胡陳州人以燒香惑眾反於信陽州破歸鹿邑焚陳州屯營於杏岡命河南左丞慶通帥兵

討之獲其旗幟宣勅金印獻之時大臣有忌漢官者取賊旗幟宣勅班地上問曰此欲何為意漢官諱言

反將中以罪許有壬曰此曹反狀甚明尚何言大臣語塞既而帝以光御秀卿棒胡皆漢人詔漢人官省

臺院及翰林集賢者講求誅捕之法以聞未幾四川合州人韓法師以擁眾自稱南朝趙王尋皆討平之

發明

粵自光御倡亂棒胡聚眾應之至是五六年間日益昌熾求之元人制禦寂未之聞當時

強藩巨鎮不聞有勤王之師謀臣猛將不聞有破賊之功夫以大盜橫行如此而元之君臣了無一

策雖欲不亡其得可哉綱目一書再書至於不勝其書其為元人深歎也夫其為後人深戒也夫

廣義

嗚呼秦二世欲窮所好所樂有陳勝吳廣之徒隋煬帝務乎窮奢極侈而有玄感李密之

輦元順欲馳騁田獵而有光御捧胡之兵噫豈惟
三君為然哉自古國君未有不以逸樂而亡者也
不然則堯舜之兢業大禹之勤儉湯之
栗栗危懼文之小心翼翼何為者哉

二月朔日食○定服色器皿輿馬之制

時服錦上無別帝初禁民間服麒麟鸞鳳白兔靈芝
生雙角五爪龍八龍九萬壽字楮黃等服至是以復
詔定其制尋禁倡優
宸服及戴笠乘馬

弛江浙諸處山澤之禁

時江浙等處饑民至四十萬戶詔發鈔四十
萬錠賑之開所在山場河泊之禁聽民樵采

三月立皇后鴻吉哩氏○禁漢人南人不得執軍器

凡有馬者拘入官既又禁漢人南人不許習蒙古字

夏四月帝如上都○五月民訛言采童男女

民間訛言朝廷刷取童

男女一時嫁娶已盡

發明

世祖之世非無災異然當時上下相安者立政用人之際足以愜服其心故也自成宗征

伐四夷用人錯謬故有括童男童女之恐至順帝

承緒政事愈益乖錯至是又有訛言采童男童女

之異此皆人心皇惑是以妖氣乘之易於恐動爾

即綱目之所書驗當時之得失則人心世變瞭然

在目矣

西番亂

殺鎮西王丹巴尋蔓延侵至二百餘處詔立行
室政院以額森特穆爾為院使督兵往討之

彗星見

凡六十有五日自昂
房歷一十五宿而滅

秋七月武陟蝗

河南武陟縣未垂熟有蝗自東來縣尹張寬仰天
祝曰寧殺縣尹毋傷百姓俄有黑鷹羣飛啄食之

八月京師地屢震

先是京師大霖雨凡十三日御河沁河渾河皆溢沒
人畜田廬不可勝計至是地大震太廟梁柱裂各室
墻壁壞壓損儀物及文宗神主御
牀凡六日方止所損人物甚眾

冬十月金華處士許謙卒

謙受業金履祥之門履祥曰士之為學若五味之在和醢鹽既加則酸鹹頓廢子來見我三日矣而猶夫人也豈吾之學無以感發于子邪謙聞之惕然居數年盡得其所傳之妙履祥既沒謙益肆充聞多所自得自謂吾非有大過人者惟為學之功無間斷爾平生制行甚嚴而所以應世者不膠于古不流于俗屏跡入華山四方之士不遠百里而來受業其數人至誠諄恇內外殫盡獨不教人以科舉之文曰此義利之所由分也不出里閭垂四十年中外名臣列其行義章凡數十上郡以道逸應詔有司請主文衡皆莫能致世稱為白雲先生卒謚文懿先是何基王柏全履祥及其學猶未大顯至謙而其道益著同時休寧陳櫟婺源胡一桂皆以請明道學見重于時云

發明

處士鮮有書卒者處士書卒錄賢也謙受學于金履祥潛心篤志不求聞達朝野交薦力

辭不起則是安于義命而非爲隱以爲仕臣之捷徑者也豈非一代之真儒乎故特書曰卒蓋于之也

廣義

綱目于白雲先生卒誌其時月而地之者重吾道也

十二月以滿濟勒葛台為太保分樞密院鎮北邊

滿濟勒葛台巴延弟時議進爵為王辭曰兄封秦王弟不宜並受王爵故有是命

巴延請殺五姓漢人不許

巴延請殺張王劉李趙五姓漢人不從

發明

嗚呼巴延殘忍酷虐之心至是見矣是時災異迭見盜賊縱橫斯民之塗炭已極國祚之

顛危漸著為元之臣子者正宜進思進忠退思補過將順其美匡救其惡納賢才革弊政君憂亦憂君樂亦樂然後不愧乃職也夫何不思經綸之策導以殺戮之心五姓漢人奚罪焉凡此皆小人策君之惡耳苟或從之其如生靈何哉故直書以著其惡

戊寅 四年夏四月以特默齊珠爾噶岱為平章政事○帝

如上都

次八里塘雨雹大如拳其狀
有小兒環玦獅豹等物之形

五月詔考覈郡縣官功過

命佛嘉律為考功郎中喬林為員外郎
魏宗為主事考較天下郡縣官功過

漳州袁州兵起

漳州南勝縣民李志甫聚眾圍州城守將緯斯戩與
戰失利詔江浙平章拜布哈發四省兵討之不克既
而州人陳君用者襲殺之龍巖尉黃佐才與賊戰妻
子四十餘口皆被害事聞授佐才龍巖縣尹袁州人
周子旺亦舉兵稱周
王改年建號尋敗死

秋八月朔日食○京師地震

日二三次凡
十日乃止

帝還大都

知已五年夏四月帝如上都○六月汀州大水

平地水深三丈沒民舍八百餘區人溺死者八千餘

發明

至元之治此亦無足稱者順帝特區區荒悞不能自強此小人之所喜而君子之所不取

者況其大節既虧小何足取故凡逆氣乘之禍亂滋出是故前年書彗星見七月武陟煌京師地震屢震去年書漳州袁州兵起八月日食京師地震是年六月又有汀州大水迭書於冊用見天人之變交應于時至明年又書彗星見京畿大水而生民塗炭矣未幾大盜四起元遂以亡然則餘慶餘殃之報夫豈僭差而或者以氣數推之則過矣

秋八月帝還大都○冬十一月盜殺河南平章政事伊

魯特穆爾等尋捕誅之

杞縣人范孟謀不軌詐為詔使至河南行省殺平章政事伊魯特穆爾廉訪使鄂勒哲布哈召官屬及去位者署而用之執大都路儒學提舉歸賜俸北守黃河口賜力拒不從賊怒繫之獄既而官軍捕孟誅之凡汚賊者皆得罪賜獨免賜同里有吳炳者嘗以翰林待制徵不起賊召司外百歷炳懼不敢辭時人為之語曰歸賜出角吳炳無光賜之名用是大著尋由國子博士拜益察御史入謝臺臣奏曰此河南抗賊不屈者帝曰好事卿宜數為之賜以上尊

發明

平章平其政事當使中外尊安社稷鞏固百姓從風而向化盜賊稽首而聽命若是則可

以無負經邦之職否則具位焉耳伊魯特穆爾身為平章而盜賊殺諸通衢不翅如獵狐兔豈不有

愧于平章百姓之任邪雖然順帝逆德妖氣乘之而盜得以擅殺平章則其變非小也雖曰捕誅國體虧矣

詔以巴延為大丞相

加元德上輔功臣之號賜七寶玉書金符

巴延矯詔殺鄒王齊齊克圖

巴延搆陷鄒王奏賜死帝未允輒傳旨殺之又奏敗宣讓王特穆爾布哈威順王庫春布哈不俟命即遣之帝為之不平

發明

巴延兇虐無復人理然綱目亦不為之廢法故凡加官等事皆舉其爵至于見討則削之

殺諸王則削之弑皇后則削之所以行天討正玉法以誅其桀逆之罪豈以無足誅責之故而遂廢討賊之法哉如唐書朱全忠殺德王裕同意

廣義

巴延既弑母后又殺親王其窮兇極惡可畏哉

長庚六年春二月巴延有罪黜為河南行省左丞相尋竄

南思州道死

巴延既誅騰言斯獨秉國鈞遂專權自恣變亂成憲虐害天下漸有異謀帝患之巴延欲以所養之子托克托宿衛領帝起居懼涉物議以知樞密院旺嘉努翰林學士承旨貫喇卜同侍禁近屬意托克托托克托政令日修衛士拱聽約束巴延自領諸衛精兵以揭珠布哈為屏蔽從道之盛填溢街衢而帝儀衛反

落落如晨星勢焰薰灼天下之人知有巴延而已托克托憂之請于父滿濟勒噶台曰伯父驕縱已甚萬一天子震怒則吾族赤矣曷若于未敗圖之其父亦以為然托克托質于師吳直方直方曰傳有大義滅親子但知忠于國爾餘復何顧焉一日見帝乘間自陳忘家殉國之意帝猶未之信時帝前後左右皆巴延黨沙克嘉本阿嚕為帝腹心乃遣二人與托克托遊以忠義之言相與往復辨論益悉其心靡他遂聞于帝帝始信之無疑及巴延擅貶宣讓威順二王帝不勝其忿決意逐之泣語托克托托克托亦泣下歸復與直方謀直方曰此大事議論之際左右為誰曰阿嚕托克托特穆爾直方曰子之伯父扶震主之威此輩苟利富貴其語一泄則主危身戮矣托克托乃延二人于家置酒張樂晝夜不令出遂與沙克嘉本等謀侯巴延入朝擒之戒衛士嚴宮門出入螭吻皆為置兵巴延見之驚召托克托責之對曰天子所居防禦

不得不爾然遂疑托克托增兵自衛至是巴延以所領兵請帝出田托克托勸帝稱疾不往巴延固請命太子雅克時古斯出次柳林托克托與阿魯等合謀悉拘京城門鑰命所親信列布城門下是夜奉帝居玉德殿名省院大臣先後入見出五門聽命夜二鼓遣集賽伊徹察判率三十騎抵營中取太子入城又召揭瑀范匯入草詔數巴延罪狀出為何南行省左丞相命平章政事珠爾噶岱賚赴柳林黎明遣騎士至城下問故托克托倨城上言有旨黜丞相一人諸從官皆無罪可各還本衛巴延奏乞陞辭不許道出真定父老奉觴酒以進巴延曰爾曹見子殺父事乎對曰不曾見子殺父惟聞臣弑君巴延俛首有慚色既而帝以巴延罪重罰輕降詔安置南恩州陽春縣行次江西隆興驛病死

發明

巴廷弑后無君專權僭竊其惡已甚故直書有罪若曰巴廷有罪而自黜之云爾迨再竄

南恩卒隕于道綱目不書卒而書死者正其弑逆之罪貶其與盜賊同歸而不得預于朝廷士大夫之列也綱目一字之間其嚴若此然後知君子汲于誅亂臣討逆賊而無待于一毫之假借也其旨嚴

矣

廣義

巴延之惡人人得而誅之雖合門寸斬無以謝天下今而得死于道其元人夫討賊之義

歟

以滿濟勒噶台為太師左丞相塔斯哈雅為太傅知樞密院事特默齊為太保御史大夫旺嘉努為平章政事托克托知樞密院

詔托克托外諸王侯不得懸帶弓箭及環刀輒入內府

彗星見

凡三十

二日

京畿大水○賜滿濟勒噶台爵忠王固辭許之

詔封滿濟勒噶台為忠王號達爾罕固辭不受御史請示天下以勸廉讓從之

夏五月帝如上都○六月詔廢文宗廟主遷太皇太后
鴻言哩氏于東安州尋崩放雅克特古斯于高麗殺諸

途

詔曰昔武宗升遐太后惑于愴慝俾皇考出封雲南
英宗遇害我皇考以武宗之嫡逃居沙漠宗王大臣
同心翊戴于時以地近先迎文宗暫總機務繼知天
理人倫所在假讓位之名以寶璽來上皇考推誠不
疑即立為皇太子而乃當躬迓之際與其臣伊噶布
哈阿哩雅明呼棟阿等謀為不執使我皇考飲恨上
賓歸而再御宸極又私圖傳子嫁禍于班布爾實皇
后謂朕非明宗子出居遐陬上天不佑隨降殞罰叔
嬪不達失里怙其勢焰舍長嫡而立次幼奄復不年
諸王大臣以賢以長扶朕踐阼賴天之靈權奸屏黜
永惟鞠育固極之恩忍忘不共戴天之義其命太常
徹去圖卜特穆爾廟主布達實哩並削太皇太后之
號使東安州安州安置雅克特古斯放諸高麗時賊臣伊
噶布哈等已死其以明呼棟阿明正典刑時監察御
史崔敬言文宗既徹廟主嬪母亦削鴻名盡孝正名
斯亦足矣惟念皇弟雅克特古斯年幼播遷天理人情

有所不忍方先皇上賓皇弟尚在襁褓未有知識義當矜閔常人有一百金之產尚置義田以收養宗族陛下富有四海乃以同氣之人置之度外貽笑他邦取辱中國儻生他變關係非輕臣願殺身以贖皇弟之罪伏望陛下迎歸太后母子以盡骨肉之義書奏不報未幾太后崩于東安州雅克特古斯遇害于道

發明

文宗有殺兄之嫌然而舍子立姪不可謂非公議也帝乃明宗之子文宗之姪以外以名

安得而行是舉乎文宗既撤廟主孀母亦削鴻名盡孝正名斯亦足矣于雅克特古斯不能容忍放而殺之果何義乎順帝但知雪父母之冤而不知顧大義之失惜哉故書廢以見不宜發也遣以見不宜邊也故與殺亦以見不宜故殺也噫順帝于天倫之義不能無虧矣

秋八月帝還大都○冬十月滿濟勒噶台罷以托克托

為右丞相特穆爾布哈為左丞相○十二月詔復行科舉

時科舉既罷翰林學士承旨庫庫從容言曰古昔取人材以濟世用必由科舉何可廢也帝采其論詔復之行

罷文宗增置官屬

初文宗設太禧宗禋等院及奎章閣藝文監增置官屬有差至是大臣議悉革罷庫庫曰民有千金之產尚設家塾以延館客堂堂天朝一學房乃不能容邪帝然之改奎章閣為宣文閣藝文監為崇文監餘悉罷之

辛巳
至正元年夏四月帝如上都

時御史崔敬上疏言天子巡幸上都宜御內殿其累
曰世祖以上都為清暑之地車駕巡幸幾以為常閤
有大安殿有鴻禧睿思所以保養聖躬適起居之宜
存敬畏之心也賞喇鄂爾多斯乃先皇所以備宴遊
非常時臨御之所今國家多故天道變更願大駕還
大內居深宮嚴宿衛與宰相謀治道萬幾之暇則命
經筵進講究古今盛衰之由緝熙聖學乃宗社之福
也時帝數以歷代珍寶分賜近臣敬又上疏曰臣聞
世皇時大臣有功所賜不過築革重惜天物為後世
慮至遠也今山東大饑燕南亢旱海潮為災天文示
儆地道失寧京畿南北蝗飛蔽天正當聖主恤民之
日近侍之臣不知慮此奏稟承請殆無虛日甚至子
府庫百年之寶物遍賜僕御閤寺之流乳稚童孩之
之子帑歲空虛萬一國有大事人有大功又將何以

為賜平乞迨回所賜以示思不可濫庶允公論

發明

元人以夏初如上都秋初遷大都者畏炎蒸也然以水土異宜而致混一之盛亦前古所

未有

矣

以特穆爾實達為平章政事○秋八月帝還大都○冬

湖廣燕南山東兵起

時湖廣道州民蔣丙何仁甫等相繼舉兵攻破江華等州縣丙尋稱順天王岷峒徭民二百餘寨亦相率入邊抄掠湖廣行省平章衣布巴勒平之山東燕南寇盜亦縱橫至三百餘處

大饑

發明 上書湖廣燕南山東兵起此書大饑文無貶詞然徐而考之賑卹救荒之政漠然無有則其克謹天戒勤卹民隱之意果何如哉夫衰亂之世本無足責然亦可驗民愁盜起之因明年大同大饑民皆相食乃視為泛常而不悟君蔽臣諛如此尚可與之有言哉

壬午 二年春正月開金口河

托克托用言者于都城外開河置埽引金口渾河之水東流達通州以通舟楫廷臣多言不可托克托排羣議不納左丞許有壬言渾河之水湍悍易決而足以為害淤淺易塞而不可行舟况西山水勢高峻金時在城北流入郊野縱有衝決為害亦輕今則在都城西南若霖潦漲溢加以水性湍急宗社所在豈容僥倖設使成功一時亦不能保其永無衝決之患帝不聽河成果水急泥壅不可行費用不貲而卒以無功

發明欲安乎民必思所以安民之道欲愛乎民必思所以愛民之道安民者何不達農時之類是也愛民者何使民以時之類是也當是時民窮盜起災異頻仍元之君臣省身克己尚恐弗及別為無益以勞乎民順帝信托克托言開金口之河費用不貲卒無成功而民力殫矣天下其有不困憊者哉此皆元室亂亡之徵耳

三月大同饑人相食

發明綱目書饑歲多矣人相食則鮮焉夫以饑而至于食人者必其草根木殼食之既盡然後至於食人也孟子曰庖有肥肉廄有肥馬民有饑色野有餓莩此率獸而食人也獸相食且人惡之為民父母行政不免于率獸而食人惡在其為民父母也考之當時元之君臣曾未見其憂卹之心

無蓋繼作溺于豫大而天
意亦未如之何也已矣

夏四月帝如上都○秋八月朔日食○九月帝還大
都○冬十月朔日食○十二月京師地震

癸未 三年春正月遼陽沃濟野人作亂

遼陽為捕海東青煩擾沃
濟野人及碩達勒達皆叛

二月鞏昌山崩

秦州成紀寧遠伏羌等
縣山崩水涌人多溺死

發明

鞏昌山崩記異也所謂期年必有大咎書鞏
昌山崩于前而書羅天麟等起兵於後雖不

指其事應而事應具存此綱目畏物之反常為異使人恐懼修省之意也其垂戒明矣與春秋書沙鹿崩同意

三月詔修遼金宋三史

初世祖立國史院命王鶚修遼金二史宋亡又命史臣通修三史延祐天曆之間屢詔修之以義例未定意不能成至是命托克托為總裁特穆爾達實張起巖歐陽玄呂思誠揭傒斯為總裁官修之或欲如晉書例以宋為世紀而遼金為載紀或又謂遼立國先于宋五十年宋南渡後嘗稱臣于金以為不可待制王理者祖修端之說著三史正統論欲以遼金為北史太祖至靖康為宋史建炎以後為南宋史一時士論非不知宋為正統然終以元承金承遼之故疑之各持論不決詔遼金宋各為史凡再閱歲書成上

之發凡舉例論贊
表奏多元屬筆焉

廣義

大抵宋為正統其義昭矣于時史官奉詔修三史者非無定論也奈以身任其朝故各致其隆而不統焉其亦因人成事者也讀者知之

夏四月朔日食○帝如上都○秋七月汴梁大水

自四月至是月霖雨不止中牟扶溝尉氏洧州滎陽汜水河陰凡七縣皆大水

八月帝還大都○冬十月親祀太廟

帝行禮至寧宗室問曰朕寧宗兄也理當拜否太常博士劉聞對曰寧宗雖弟其為帝時陛下為臣春秋時魯僖公閔公兄也閔公先為君宗廟之祭未聞僖公不拜陛下當拜乃拜之

十二月以伯勒齊爾布哈為左丞相特穆爾布哈罷○
徵清江處士杜本不至

本在武宗時嘗被召至京師即歸隱武夷山中文宗
聞其名徵之不起迨托克托薦之召為翰林待制兼
國史院編修官使者趣至杭州稱疾固辭又徵處士
鄂勒哲圖濟爾噶朗董立李孝先張樞樞辭不至以
郎或疑其太優右丞相特穆爾達實曰隱士無求於
朝廷朝廷有求于隱士區區
名爵何足吝惜識者誦之

發明

書不至何美杜本也杜本潔身亂倫曷為美
之蓋杜本躬逢盛世甘于不任而非偽隱以

微名者可謂知其道而不知有其勢者焉或以
為譏則過矣順帝紛紛制作獨此差強人意書之

所以不沒
其善也

甲申 四月春正月詔定守令黜陟之法

六事備者升一等四事備者減一資三
事備者平遷六事俱不備者降一等

河決曹州

發丁夫萬五千八百
塞之是月又決汴梁

二月以賀惟一為平章政事

既而以為御又大夫故事臺省正官非
國姓不可惟一固辭詔賜姓名曰太平

閏月以托克托兼領宣政院事

時諸山主僧請復僧司且曰為郡縣所苦如坐地獄托克托曰復僧司何異地獄中復置地獄邪

廣義

嗚呼元人之國敗壞不可收拾者過於奉佛寵僧也托克托拒僧請何其深切時病歟

三月以納麟為平章政事○夏四月帝如上都○五月托克托罷以阿魯圖為右丞相

托克托辭相位帝問誰可代者以阿魯圖對遂召用之封托克托為王何魯圖既為相議除一人為刑部尚書或難之曰此人柔軟非刑部所可用阿魯圖曰選僧子邪若選僧子須用強壯人尚書詳讞刑獄不枉人壞法即是好官何用強壯者其為治知大體如此

秋七月温州地震海溢○八月帝還大都○九月朔日

食○冬十月令民入粟補官

備賑濟也。有匿奸罪而輸粟得七品雜流者為恕家。所告有司議輸粟例無有過不與之。文中書右司郎中成遵以為賣官鬻爵已非令典。况又賣與奸淫之人。其何以為治。必奪其敕還其粟。著為令。乃可從之。時有議職吏遭喪不許歸葬。須竟其獄者。遵曰。惡人固可怒。然與人倫孰重。國家以孝理天下。寧失罪人。不可使天下有無親之吏。議遂寢。

爵者國之公器。非可賣也。而賣之粟者。民之發明命脉。非可入也。而入之于以見用度奢侈之患。為如何哉。其曰。令民入粟補官。則經費不足。充用之意。又自不言可見矣。其與漢武之買爵贖罪者。又何差殊之有乎。順帝費出無經。國用日竭。而乃區區令入民間之粟以補朝廷之官。其謀亦陋。

矣故書
譏之

五年春正月薊州地震○夏四月帝如上都○五月
翰林學士承旨庫庫卒

初庫庫知經筵曰勸帝就學帝欲寵以師禮固辭不
可帝嘗欲觀畫庫庫取此于圖以進一日帝覽宋徽
宗畫稱善庫庫進曰徽宗多能惟一事不能帝問一
事謂何對曰獨不能為君爾身辱國破皆由不能為
君所致凡為人主貴能為君他非所尚也其隨事規
諫皆類此嘗謂人曰天下事宰相當言宰相不得言
則臺諫言之臺諫不敢言則經筵言之備位經筵得
言人所不敢言于天下之前志願足矣故于時政得
失有當匡救者未
嘗緘默至是卒

發明庫庫直道匡君每事諷諫畧無避諱此誠元

臣事君盡忠者之勸耳

廣義

綱目於庫庫之罕月之而銜之者重其人品之正也

秋七月以袞布巴勒為平章政事○河決濟陰

漂官民廬舍殆盡

八月帝還大都○九月朔日食○遣使巡行天下

時諸道奉使者皆與臺諫交相掎蔽惟巡京幾道西臺中丞鼎鼎集賢侍講學士蘇天爵糾舉無所避凡興革者七百八十三事糾劾九百四十三人都人稱天爵為包拯天爵亦竟以忤時相罷去

丙戌六年春二月朔日食○山東地震○夏四月帝如上都○五月陝西饑

行酒
禁

盜竊太廟神主

發明 盜竊太廟神主至是三見綱目則元人之怠緩不恭益甚矣夫以宗廟之中所守者至嚴

所入者亦鮮所謂盜者安能駕空乘虛而進竊祖宗之神主乎此亦元人無意於祖宗所守怠緩盜得乘之焉耳嗚呼宗廟神主為盜所竊而茫然無知莫重者宗廟而宗廟既輕則天下復有何事重于此哉元人之罪于斯甚矣

六月羅天麟等兵起破汀州

天麟及陳積萬陷長汀命江浙行省右丞呼圖克布哈合兵進討未幾其徒羅德用殺天麟積萬來降

雲南夷死可伐作亂○秋七月以多爾濟巴勒為右丞

時有善音樂得幸者帝命為崇文監丞參政多爾濟巴勒擬一人以進帝怒曰選法盡由中書邪多爾濟巴勒奏曰用幸臣居清選恐後世以此議陛下令選他人臣實有罪他省臣無與焉帝悅陞右丞

八月帝還大都○冬十二月靖州獠吳天保作亂

時湖廣獠俱亂而天保勢尤熾寇陷黔陽武岡淑浦詔郡縣湖廣右丞寶保率師討之尋敗沒天保遂有衆六萬餘未幾廣西峒獠亦乘隙入寇

是歲河決

尚書李綱請躬祀郊廟近正人遠佞邪以崇陽抑陰不聽

阿嚕圖罷

先是伯勒齊爾布哈與阿嚕圖謀擠托克托阿嚕圖曰我輩亦有退休之日人將謂我何伯勒齊爾布哈屢與言終不從乃風御史劾奏阿嚕圖不宜居相位阿嚕圖聞之即辭避出城所親為之不平請見上自陳阿嚕圖曰我博爾濟世裔豈以丞相為難得邪但上命我不敢辭今御史劾我我即宜去御史臺乃世祖所建我與御史抗即與世祖抗矣汝等勿復言阿嚕圖博爾濟四世孫也

廣義

抑觀阿嚕圖賢相也今其罷去則國事日非蓋可知矣

丁亥七年春正月朔日食

是日大寒而風
朝官扑者數人

發明

日食正旦此天下之大變也自災異日尋至

年而方國珍李三徐壽輝等唱亂自是盜賊橫行
元室遂滅孰謂果無天道乎即綱目之所書驗至
正之政事治
亂可以識矣

以伯勒齊爾布哈為右丞相尋罷○以蓋苗為參知政
事

時大臣以兩京馳道狹隘奏毀民田廬廣之已遣使
督治蓋苗言馳道創自至元初何今日獨以為狹刀

辨其不可乃止又欲出宿衛士為郡長官俾以養貧
 苗曰郡長所以牧民豈養貧之地果不能自存賜之
 錢可也若任郡守必擇賢而後可議遂寢又欲與角
 觚者錢萬貫苗曰諸處告饑不蒙賑卹力戲何功獲
 此重賞乎于是丞相謂僚佐曰所以引蓋君至此欲
 其相助也乃每事沮抗如此後有公務毋白叅政苗
 聞即欲引去適有旨拜江南行臺御史中丞丞相怒
 不解此至復除甘肅行省左丞

以宦者拜特穆爾為司徒

發明司徒周官大卿之職而當時至貴之爵以至
 貴之爵加于至賤之人不幾乎有負且乘之

識乎夫以爵所以待有功祿所以養有德勞其為
 國盡心也且如拜特穆爾不過閹寺小人初無才
 德可取司徒之職又豈閹寺之所宜居耶噫以閹
 奴而任司徒之職名器既濫紀綱逆施而天下有

不亡者哉。綱目書以宦者拜時穆爾為司徒文無
貶詞乃所以深貶之爾。此直書文貶之意也。學者
試思之。

二月山東地震

壞城郭有聲如雷三月
東平又震河水動搖

夏四月復以伯勒齊爾布哈為右丞相以特穆爾達實為
左丞相伯勒齊爾布哈尋罷

帝嘗問特穆爾達實為治何先對曰法祖宗又問王
文統竒才也恨不得如斯人者用之對曰世祖有堯
舜之資文統不告以王道而乃尚伯術要近利世
祖之罪人也使今有文統正當遠之又何足取乎

河東大旱

民多饑死

帝如上都○六月放太師滿濟勒噶台于西寧

伯勒齊爾布哈以憾譖滿濟勒噶台徙西寧州其子托克力請與俱行時相欲傾之因有告變者移于西城薩克蘇之地御史大夫額琳沁巴勒曰托克托父子無過何迫之于險遂召還甘肅尋卒

發明

滿濟勒噶台無罪者也曷放之因伯勒齊爾布客之譖耳夫人君之德莫大乎至明明以

照奸則百邪不能蔽滿濟勒噶台國之元老持正不阿初無過惡縱有浮言獨不能為之加察乎嗚呼順帝之待大臣奚翅鷹犬受讒而罷輕如厮役又豈優禮大臣之道哉綱目書故而不去其官所

以明其
無罪爾

復以太平為平章政事○秋九月帝還大都○時穆爾
達實卒以多爾濟為左丞相○冬十月沿江兵起

兩淮運使宋文瓚言江陰通泰江海之門戶而鎮江
真州次之國初設萬戶以鎮其地今戎將非人致賊
艦往來無常集慶花山賊才三十六人官軍萬數不
能進討反為所敗後竟假手鹽徒雖能成功豈不貽
笑遠近宜亟選智勇以圖後功不然則
東南五省財賦恐非國家有矣不聽

賜大承天護聖寺田

以山東地十六萬三
千餘頃賜之為永業

廣義

是時天下洶洶民窮盜起此正元順臨深履薄夙興夜寐以迓續天命之時夫何不是之

慮錫田僧刹以徼福利噫國以民為本今而民困饑寒而未聞賑卹救荒之事賜之寺田又豈可以益于國乎且民不賑而賑僧國不治而治寺燭理之君惟當務之急安得先于不急之務也哉故直書識之

廣義

是舉也譬諸久病危羸之人而加以酒色之損其能不殞厥軀者鮮矣

十一月以多爾濟為右丞相太平為左丞相

先是多爾濟為左丞相請于帝曰臣藉先臣之蔭蚤襲國王昧于國家之理今備位宰相非得太平不足與共事至是遂拜太平左丞相多爾濟右丞相時順江苗長樂珠求內附請立宣撫司及置郡縣省臣將

以許之右司都事歸瑒曰既設郡縣有事不救則孤
來附之意救之則疲中國而事外夷真獲虛名而受
實禍也與左丞呂思誠抗辨甚力太平問其策安出
瑒曰可授其酋長宣撫勿責其貢稅使者賜金帛遣
歸足矣卒
從瑒言

詔選臺閣名臣出為守令

以連年水旱民多失業選臺閣名臣二十六人出為
守令許民間利害實封呈省時魏中立薦韓鏞為堯
州路總管堯俗尚鬼鏞至凡境內淫祠悉毀之人初
大駭已而歎服選民俊秀入學求尊宿有學者為
五經師朔望幅巾深衣以謁先聖每月
考課以示勸勉由是人人自力於學

廣義

此舉最為有得

以韓吉納為平章政事

戊子八年春二月納琳免○立行都水監於鄆城

以賈魯為太監魯循河道察地形備得要害為圖上
二策其一議修築北隄以制橫潰則用工省其二議
疏塞並舉挽河東行使復故道其工數倍會魯還中
書右司郎中議未及竟明年又立山東河南等處行

都水

監

三月帝臨國子學

賜行聖公銀印陞秩從二品定
弟子員出身及省親奔喪等制

發明

順帝即位十有六年而臨國學之事寂然無
聞夫以人君為治莫先於重儒術儒術者國

家之柱石元氣也蓋元氣固則百邪不能害是以重儒術正所以敦國本也順帝每事驕奢不恤國政而獨于臨太學之事差近人情此由其人欲雖多而天理間有萌動之機爾綱目特揭而書之于冊者亦所以不沒其善也

廣義

當國事倥偬之際而有是舉其亦知所重者歟

帝如上都○夏五月霖雨山崩江溢○秋七月朔日食
○八月帝還大都○奎章閣侍書學士致仕虞集卒

謚文靖集性孝友學博洽而究極本源研精探微心解神契其經綸之妙一寓諸文頗有宋慶歷乾淳風烈

發明

虞集學問該博事君忠直自文宗至順四年因馬祖長之佞謝病而歸一十六載優游家

居無心軒冕而惟以著述為功誠一代之人豪也元有此人而順帝不能知羣臣不能舉俾之老死曷下豈不深可惜哉卒而具官益予之也

冬十月吳天保寇全道州○十一月台州方國珍兵起

台州黃巖民方國珍與蔡亂頭等相讐敵遂入海為亂劫掠漕運詔江浙參政多爾濟巴勒討之追至福

州國珍知事危焚舟將遁元兵自相驚潰多爾濟巴勒被執國珍迫其上詔降之狀朝廷從之授國珍兄

弟以官國珍不肯赴勢益猖獗時監察御史張禎言明呼棟阿阿哩雅伊魯布哈皆陛下深仇巴延賊殺

親王一十二口法當族誅而其子孫兄弟尚皆仕于朝今災異迭見盜賊蜂起海寇敢于要君閭帥敢于

玩寇若不振舉恐有唐末藩鎮噬臍之禍不報御史李泌亦言世祖誓不與高麗共事而陛下乃以高麗奇氏位皇后今河決地震盜賊滋蔓皆陰盛陽微之象乞降為妃亦不聽

廣義

觀夫分註則知元兵之不振也久矣

以台哈布哈呼圖克布哈為平章政事

丞相太平薦台哈布哈可相故有是命明年太平罷台哈布哈黨于托克托謀害太平人以是薄之
丑巳九年夏四月以奇徹台為平章政事○帝如上都

棗陽童子暴長

棗陽張氏婦生男甫及周歲暴長四尺許容貌異常儲腹臃腫見人嬉笑如世所畫布袋和尚云

發日暴長何反常道也綱目書山崩河決日食地

甫及周歲暴長四尺則其反常亦甚焉夫以周歲之兒尚在襁褓安能暴長之若是耶蓋此國家將亡妖孽迭見而天地多變人物多妖則其不善之積其來尚矣綱目書此特以見天變之大可畏也

噫

秋七月多爾濟太平俱罷以托克托為右丞相

滿濟勒噶台卒太平請令托克托歸葬皆以為難及平為固請托克托得還拜太傅然不知太平之有德於已也因汝中柏讒間欲中傷之是時叅政孔思立等皆太平所拔用悉誣以罪太平既罷又誣劾之托克托母聞之謂曰太平好人何害于汝而欲去之若違吾言非孝子遂止太平改吏田復勸之自裁太平

曰吾無罪當聽于天若自殺則誠有歎焉遂奉元

八月以栢顏為平章政事○冬十月命皇子阿裕實哩

達喇習漢人文字

皇子阿裕實哩達喇人端本堂肄業以李好文為諭德歸賜為贊善張中為文學托克托領其事堂虛中座以侯臨幸皇子與師傳分東西向坐授書其下僚屬以次列坐好文取經史集有闕治體者為書曰端本堂經史要義又取古史自三皇迄金宋國祚久遠治亂興廢為書曰大寶錄前代帝王善惡當法戒者為書曰大寶龜鑑以進復上書曰殿下以臣所進諸書參之貞觀政要大學衍義等篇推而行之則太平之治不難致矣他日皇子坐清寧殿外布長席列此高麗西番僧曰李好文先生教我儒書多年尚不曉

其意今晚佛法一夜即
曉由是愈崇尚佛學

十一月朔日食○詔削沃呼海壽官流韓吉納於尼嚕

罕

初海壽為監察御史劾瑪爾哈及弟舒蘇出入托果
斯皇后宮闈御史太韓吉納以聞帝不省章三上
僅奪哈瑪爾舒蘇官居之草地出海壽為陝西副使
吉納罷為宣政院使尋出為浙省平章政事至是托
果斯皇后以其言侵已泣訴于帝帝怒乃奪海壽官
屏歸田里禁錮之并誣吉納贓罪杖流于尼嚕罕以
死

發明

無罪而殺士則大夫可以去此狐死鬼悲之
意也是時海壽已劾哈瑪爾不聽則君子可

以見幾而作矣況言納亦為御史大夫自可乞身而退既不能然遂以言事坐貶夫御史言事之職也有言責者不得其言則去海壽言納既無負於言矣則夫致為臣而去歸隱丘園亦何不可之有尼嚙罕之行不必往可也綱目書劄沃呼海壽官流韓吉納而不書其御史之官其亦為賢者諱乎其亦惜其去之不早乎不然以言褫職非失職也其與唐書貶韓愈為山陽令同意

庚寅 十年春正月以綽斯戩為平章政事○夏四月赦

帝如上都○六月有星入於北斗

大如月震
聲如雷

發明 有者所未嘗有者也有星如月入於北斗而震聲如雷則其變亦大也入于北斗斗有環

域天之三辰綱紀星也先儒謂三辰失行山崩川竭而謂之天地不位况有星如月入于北斗者乎此蓋朝無善政民有憂惶而天變之來因之以相警告耳嗚呼善政格民惟德動天考之當時視災變為故物一切置之不顧欺天罔人豈有過於順帝哉此君子不惟為順帝怒而又為順帝惜也

廣義

觀春秋之書災異未有如元末之甚也然自開闢以來亦未有如元人入主中國而致混

一之盛也今天動威而垂異如此無乃以其失德而欲亡之速歟

秋八月帝還大都○冬十一月朔日食○更鈔法

丞相托克托欲更鈔法集省臺兩院共議之先是左司郎中武祺以鈔法不行請如舊凡合支名目於總庫轉支從之至是與吏部尚書僕哲篤迎合丞相意請以鈔一貫文省權銅錢一千文鈔為母而錢為子

金錢寶貨而以鈔易之即使工下流通亦易於腐敗非經久之

計也昔人交子
會子每行之多
弊不使於民凡
為民所不便者
皆不可行鈔法
其一端也

衆皆唯唯惟國子祭酒呂思誠曰中統至元自有母
子豈有以故紙為母而立銅為子者乎又曰錢鈔用
法見為一致以虛換寔也今歷代錢與至正錢中統
至元鈔文鈔分為五項慮下民藏其寔而棄其虛恐
不為國家利僕誓篤曰至元鈔多偽故更之思誠曰
至元鈔偽人為偽爾且偽鈔人猶識之交鈔人未之
識偽將滋多僕誓篤曰錢鈔兼行何如思誠曰錢鈔
兼行輕重不倫何者為母何者為子女不通古今徒
以口舌取媚大臣可乎僕誓篤愈曰公有何議思誠
曰我有三字議行不得行不得丞相托克托見思誠
言直頤疑未決御史大夫額森特穆爾曰呂祭酒之
言亦有是者但不當於廊廟中大聲厲色爾於是諷
御史劾思誠狂妄左遷湖廣行省左丞遂定更鈔之
法以中統交鈔一貫省權銅錢一千文唯至元鈔二貫
仍鑄至元通寶鈔與歷代銅錢並用以寔鈔法至元
鈔通行如故令民間通用行之未久物價騰湧至逾

十倍及兵興所在郡縣皆以物貨相貿易公私所積者皆不行國用由是大乏

十二月方國珍攻溫州

辛卯十一年

天完主徐壽輝治平元年

夏四月詔修河防左遷工部尚

書成遵為河間鹽運使以賈魯為總治河防使

初黃河決托克托集羣臣議言人人殊惟漕運使賈魯以為必塞北河疏南河使復故道役不大興言不能已於是遣工部尚書成遵與大司農圖嚕行視河議其疏塞之方以聞遵等自濟濮汴梁大名行數千里掘井以量地之高下測岸以究水之淺深博采輿論以謂河之故道斷不可復且曰山東連歉民不聊生若聚二十萬衆於此地恐他日之憂又有重於河患者托克托先入魯言及聞遵等議怒曰汝謂民將反

邪自辰至酉論辨終莫能入明日執政謂遵曰修河之役丞相意已定且有人任其責公勿多言幸為兩可之議遵曰腕可斷議不可易遂出遵河間鹽運使詔開黃河故道命魯以工部尚書充河防使發河南北兵民十七萬自黃陵岡南達白茅放於黃岡哈濟等口又自黃陵西至陽青村凡三百八十里有奇興功凡五閱月諸埽堤成河復故道授魯集賢大學士賜托克托世襲達爾罕之號其餘遷賚有差先是河南北童謠云石人一隻眼挑動黃河天下反及魯治河果於黃陵岡得石人一隻眼而汝穎之兵起宋濂曰議者往往謂天下之亂皆由賈魯治河之後勞民動衆之所致殊不知元之所以亡者紀綱廢弛風俗偷薄其致亂之階非一朝一夕之故也使魯不興是役天下之亂詎無從而起乎

發明

甚哉順帝之迷而不悟也孟子曰得乎丘民而為天子然民雖至賤邦本所關卹其錢寒

救其疾苦此固為民父母之心今而詔修河防輕用民力河防雖固民病益深天下孰與為守乎成道詳察河道力言非便是憂國之臣也怒而左遷謂之何哉噫元之紀綱廢弛風俗偷薄天怒於上而不悟民怨於下而不知徒以詔修河防欲復故道嗚呼亦未矣本之則無如之何綱目書此詞繁而不殺則其義自見

冀晉地震

半月乃止懷孟等州俱震有聲如雷圮民居屋壓死者甚衆

帝如上都○五月朔日食○潁州劉福通蕭縣李二羅田徐壽輝等兵起

先是四方盜賊蜂起有司不能制及發丁夫開河民心益愁怨思亂有韓山童者樂城人自其祖父以白蓮會曉香惑衆謫徒水至山童倡言天下大亂彌勒佛下生河南及江淮愚民翕然信之福通與杜遵道羅文素盛文郁王顯忠韓雅爾復詭言山童寔宋徽宗八世孫當為中國主乃刑白馬黑牛誓告天地遂同起兵以紅巾為號縣官捕之急山童就擒其妻楊氏及其子韓林兒逃之武安惟福通黨盛不可制朝廷乃命同知樞密院園沁以兵擊之福通既破潁州遂據朱臯攻羅山上蔡真陽確山諸縣尋犯武陽葉縣陷汝寧府及光息二州衆至十萬李二號芝麻李亦以燒香聚衆與其黨趙均用彭早住攻陷徐州標之羅田徐壽輝與倪文俊鄒普勝等聚衆舉兵亦以紅巾為號攻陷蘄水縣及黃州路

發明

至是劉福通李二徐壽輝相繼唱亂五六年間日益滋蔓求之元人勦捕寂寂無聞其間

攻陷州郡幾半天下厥後陷漢陽破江州破饒信等州如入無人之境未幾遂陷江淮汙辱黎庶當時朝廷不聞有討伐之師諸鎮未見有連帥之舉夫以四海之鼎沸如此而雖欲不亡何可得哉

六月江浙行省左丞博囉特穆爾擊方國珍兵敗被執秋七月遣大司農達實特穆爾招降之

國珍入海燒掠沿海州郡朝廷遣博囉特穆爾往擊之兵至大閭洋國珍夜率勁卒縱火鼓譟官軍不戰皆潰赴水死者過半博囉特穆爾被執以為國珍飾辭上聞朝廷弗之知復遣大司農達實特穆爾等至黃巖招之國珍兄弟皆登岸羅拜退止民間紹興總管台哈布哈欲遣人襲殺之達實特穆爾夜過台哈布哈密以事白之達實特穆爾曰我受詔招降公欲擅命邪事乃止檄台哈布哈至海濱散其衆拘其海

舟兵器授國珍

兄弟官有差

八月帝還大都○詔知樞密院事額森特穆爾督兵擊

劉福通

時福通兵勢日盛托克托奏以其弟御史大夫額森特穆爾知樞密院事及衛王庫春格爾率諸軍十餘萬討之復上蔡擒其黨韓雅爾誅之

冬十月饒信等路雨黍

信州及邵武雨黍饒州建寧兩黑子大如黍菽衢州兩黍民多取而食之

發明

黍稷稻粱皆地之所產非天之所得有者今饒信等路雨黍則是陰陽反常其變大矣是

時盜賊橫行攻陷城邑朝無善政民無寧居乖氣致異必然之理也此皆未嘗有之事今既有之所以為異耳噫天厭元德世運將傾因無足惜者獨當時之民為可惜也綱目書此其亦不得已焉耳

徐壽輝稱帝於蘄水

壽輝據蘄水為都國號天完自稱皇帝改元治平以鄒普勝為太師攻陷饒州執魏中立陷信州執于大本皆脇使從己命以官二人不屈壽輝並殺之

廣義

壽輝并蛙之見耳方崛起草茅而遽爾稱尊其器可知

十一月有星孛於西方

見於妻胃

昂星之間

發明

西方金位金為兵革之象星孛西方此蓋兵革彌興之徵也後十餘年天下亂元室亡當

是時盜賊倡熾憑陵海內日敝於兵暴骨如莽其戾氣所感固將惡元而降之罰也故氣祲所指在於西方四海恟恟元室遂滅天之示人顯矣史之有占明矣如魯哀十三年書有星孛於東方同意以多爾濟巴勒為平章政事

多爾濟巴勒勤言治國之道綱常為重前西臺御史張桓仗節死義宜旌之以勸來者又言祖宗用兵不專於殺人今倡亂者數人乃盡坐中華之民為叛逆宜足以服人心言頗忤托克托時托克托倚任汝中栢拜特穆爾兩人擅權用事多爾濟巴勒正色立朝無所附麗未幾出為西臺御史大夫

壬辰十二年春正月徐壽輝兵破漢陽諸郡威順王庫春

布哈等棄城走二月破江州總管李黼死之

壽輝遣其將丁普郎等陷漢陽興國武昌威順王及平章政事和尚等並遁去又攻沔陽推官俞述祖戰敗被執不屈壽輝怒支解之壽輝既破武昌遂南攻九江右丞博囉特穆爾方駐兵於江聞風宵遁黼檄鄉落聚木石於險處遏其歸路黃梅主簿伊蘇特穆爾願出擊賊黼與之出戰大敗賊兵殺獲二萬餘人黼曰賊不利於陸必以舟薄我乃今以長木數千冒鐵錐於杪暗植沿岸水中賊舟數千艘順流鼓譟而至遇木椿不得動黼發火箭射之焚溺無算時東際淮甸西自荆湖守臣往往棄城遁獨黼守孤城中外援絕而賊勢益熾進兵薄城分省平章圖沁布哈自北門出走黼引兵登陴賊已焚西門張弩射之轉攻東門黼怒往救賊兵已入矣猶與之巷戰力不能敵乃揮劔叱之曰殺我母殺百姓賊刺之墜馬與兄冕

之子秉昭俱死州民間之哭聲震天具棺葬之時冕居頴亦死於賊事聞贈黼淮南左丞隴西公諡文忠發明走者匹夫輕身之事其卑賤辱命又益甚矣夫貴為親王又承君命一旦為盜賊所逐竄身苟免不翅如狐兔之避鷹犬何面目以見天子乎是時盜賊充斥守臣逃遁獨李黼聚積鄉兵櫻城固守死生以之可謂知有其國而不知有其身者矣當時偷生苟免之徒視黼字無少愧哉故網目於威順王則書棄城走於李黼則書死之予奪之旨嚴矣

以伊魯布哈為平章政事○定遠郭子興等兵起破濠

州

子興見汝頴兵起列郡騷動遂與其黨孫德崖等舉兵自稱元帥攻拔濠州據之徽爾布哈率兵欲復濠

城憚不敢進惟日掠良民為盜以徵賞由是
民恟恟不安其豪傑咸投入城中以自保

三月徐壽輝兵破袁瑞饒信徽等州○詔省臺官兼用

南人

自世祖以後臺省之職南人斥不用至是
始復舊制詔南人有才學者並許用之

台州路達嚕噶齊台哈布哈與方國珍戰於澄江死之

時朝廷方征徐州命江浙募舟師北守大江國珍懷
疑劫其黨入海台哈布哈遣義士王大用往諭國珍拘
留不遣其黨陳仲達往來議降台哈布哈具舟張受
降旗乘潮下澄江觸沙不行垂與國珍遇呼仲達申前
議仲達目動氣索台哈布哈覺其異手斬之即前搏
賊船奮擊之賊羣至欲抱持入其船台哈布哈怒叱

之奪刀殺賊賊攢刺之中頸死猶植立不仆投
其屍海中事聞追贈江浙平章封魏國公諡忠介
發明 嗚呼台哈布哈可謂丈夫矣賊勢猖獗遠近
騷動而守臣莫敢與之拒者布哈挺然不懼
親搏賊船力戰而死顧不偉哉蓋由浩然之氣養
之有素是以自反而縮雖千萬人亦往焉觀其與
賊鏖戰戰敗不屈非有浩然之氣者能
如是耶特書死之所以予其全節也

隴西地震

凡百餘日城郭頽圯陵谷遷變定西會州靜寧莊浪
尤甚會州公宇墻崩獲弩五百餘長者丈餘短者九
尺人莫能挽因改定西為
安定州會州為會寧州

徐壽輝破吉安路

鄉民羅明遠
起兵復之

命各行省分兵擊諸路起兵者

發明

前史載討捕盜賊而綱目乃變文書分兵擊諸路起兵者書法若此畧無寬恕順帝之意

其書法之嚴終始不易凡若此類非綱目不能修也然煬帝十二年綱目亦書分遣使者發兵擊諸路起兵者而與此書相似何蓋隋帝弒君之賊而順帝無道之君誅亂賊斥無道乃綱目之本意也故其書法亦同合綱目前後之書法觀之然後知誅亂賊斥無道之旨始可與言綱目者矣

夏四月朔日食○額森特穆爾軍潰召還復為御史大夫左遷西臺御史大夫多爾濟巴勒為湖廣平章政

事

額森特穆爾駐軍沙河軍中夜驚盡棄軍械北奔汴梁收散卒退屯朱仙鎮朝廷以額森特穆爾不知兵遣平章曼濟代還仍為御史大夫西臺御史范文劉希曾等劾其喪師辱國托克托私庇之御史周伯琦附托克托劾文等越分干譽乃遣多爾濟巴勒為湖廣平章出文等為各郡判官由是人莫敢言多爾濟巴勒受命闕中涕泣遮留慰遣之從間得出至湖廣汝中柏等與托克托曰不殺多爾濟巴勒丞相終不安命給軍餉總兵者希旨數侵辱之不動托克托遣其子助教鄂勒哲至軍中諷使害之鄂勒哲益加敬禮謂人曰平章國之勳舊吾苟傷之人不食吾餘矣多爾濟巴勒感風疾竟卒于黃州

發明

直書軍潰以見軍非能潰額森特穆爾潰之也夫以長子帥師弟子輿尸此聖人之大戒

也先弟子安可使之帥師令既喪師辱國禮宜正法而乃召還京師仍復前職烏在其能討有罪乎多爾濟巴勒身居言責所當劾究不惟不聽而又左遷惡在其能信直言乎噫忠言既不能信邪僻又不能誅天下之人心解體矣順帝處四海亂離之時自治不暇而所為如此則天下豈有不亡者哉直書于策其義自見

以綽斯噶為平章政事○帝如上都○詔天下完城郭築隄防○五月徙瀛國公子趙完普等于沙州

御史齊齊克特穆爾言諸處羣盜輒引亡宋故號以為口實宜徙和尚完普及親屬于沙州安置禁人交通徙之

六月大名路旱蝗

饑民七十

餘萬口

秋七月徐壽輝兵襲杭州江浙參知政事樊執敬戰死
董搏霄率兵復之遂復徽州

先是壽輝遣項普畧引兵掠徽饒諸州遂犯昱嶺闕
來攻杭州城中猝無備執敬遽上馬率衆出中途與
賊遇乃奮力斫賊中鎗而死時董搏霄從江浙平章
嘉瑋征安豐乘勝攻濠州朝廷命移軍援江南遂渡
江至德清而杭州已陷嘉瑋問計搏霄曰賊見杭州
子女玉帛必縱欲不服為備宜急攻之若退保湖州
賊乘銳趨京口則江南不可為矣嘉瑋不能決諸將
亦難其行搏霄曰公江浙相君方面失陷而及今不

取誰任其咎拔劍顧諸將曰相君在是敢有慢令者斬遂進兵薄杭州賊迎敵搏霄麾壯士突前諸軍相繼夾擊凡七戰賊奔接待寺塞其門而焚之皆死遂復杭州已而餘杭武康德清于潛安吉千秋闕皆次第以平賊將潘大湍梅元等俱以其徒來降尋進克廣德蕪饒諸賊復犯徽州賊中有道士能作十二里霧搏霄引兵擊之賊大潰斬首數萬級擒道士焚其妖書而斬之徽州遂平

發明

自徐壽輝倡亂橫行江南攻陷州郡而莫敢當其鋒者則元人之守備疎畧亦可見矣樊

執敬死于兵難曷為不書死之蓋參政大臣不能計出萬全期必破賊而乃倉卒率衆與戰中途自其一敗而杭城遂陷則是昧于臨事而懼好謀而成之理雖戰而死果何益乎故特書戰死以示貶

廣義

壽輝未有功德而遽爾稱帝其識見卑矣搏霄以此料之洞見其肺腑者也何其善于料

敵也
邪

八月方國珍攻台州浙東元帥頁特密實擊走之○右
丞相托克托率軍擊李二于徐州大破之屠其城

托克托亡率師伐李二詔許之兵部尚書穆爾瑪哈
穆特言大臣天子股肱中書庶政根本不可一日離
亡留托克托弼亮天工庶內外有兼治之宜不報詔
托克托以達爾罕太傅右丞相分省于外總制諸路
軍馬凡爵賞誅殺悉聽便宜從事九月至徐州攻其
西門賊出戰以鐵翎箭射馬首托克托不動麾軍奮
擊破之芝麻李遁去趙均用彭早住走濠州追擒其
將數十人遂屠其城帝遣平章布哈即軍中加托克
托太師
趨還朝

發明

王者之師弔民伐罪而已非若盜賊殺掠屠戮之比也托克托為右相親統六軍既破逆

賊撫定其民斯為宜也屠之何義乎且民之所以陷賊者乃不得已何苦相殺以逆其忿哉故書屠

以著

其暴

帝還大都○九月以余闕為淮西宣慰副使守安慶

時闕以浙東廉訪僉事居母憂于家值兵擾河南臨
郡縣乃起闕副使僉都元帥府事分兵守安慶抵官
十日而寇至拒却之乃集有司諸將議屯田守戰策
環境築堡砦選精甲外捍而耕稼于中浚隍增陴隍
外環以大方深塹三重南引江水注之環植木為柵
城上四面起飛樓表裏完固俄陞都元帥廣西苗軍
五萬從帥阿爾斯蘭沿江下抵廬州闕移文謂苗蠻
不當使之窺中國詔阿爾斯蘭還苗軍暴于境者即

收戮之凜凜莫敢犯時聲盜環布四外
闕居其中左提右挈屹為江淮一保障

冬十月霍山崩

前三日山如雷鳴禽獸驚散隕石數里

十一月江西行省平章政事桑擊節趙普勝戰于湖

口兵敗死之

桑節初為南臺御史大夫執政惡之出為湖廣平章
至是移江西桑節馳赴任比至江東復有詔令守江
州時江州已陷趙普勝周驢等據池陽太平諸郡號
百萬桑節募兵得三千人趨銅陵克之擒驢得其船
六百艘軍聲大振遂復池州分兵攻石埭諸縣進據
清水灣又大破之賊聞安慶聞其風燒營遁去遂進

復湖口縣克江州留兵守之命王惟恭柵小孤山桑節自據番陽口綴江西要衝以圖恢復日久援不至賊乘大艦來攻編葦筏塞上下流之水桑節率兵力戰衆死且盡桑節猶堅坐不動中流矢而仆賊素聞其名不忍害身至密室乃蘇羅拜饋食桑節斥之凡七日乃自力而起北向再拜曰臣力竭矣遂絕桑節河西人諱斯戩之子也

發明

昔隋楊負不義之名故雖致命效死之臣皆不得書今元雖蒙古然亦混一天下既久是以桑節即以死節持書于冊綱目之去取如此一以孤逆賊之黨一以褒忠義之士皆以垂世勸也

以察罕特穆爾為汝寧府達嚕噶齊李思齊知府事

時汝穎兵勢大振不數日江淮諸郡皆殘破朝廷徵兵致討卒無成功沈丘人察罕特穆爾與羅山李思

齊同奮義起兵邑中子弟從者數百人破賊事聞遂
並用之于是所在義士俱將兵來會得萬人屯沈丘
自成
一軍

趙均用入濠州據之

時徐州既下彭早住趙均用率餘黨奔濠州托克托
命賈魯追擊之均用與郭子興孫德崖極力拒守會
魯死兵乃解去早住均用遂據濠城稱王初二人本
以窮處來奔子興與德崖反屈已下之事皆稟命遂
為所制既而住
死均用益自專

御批續資治通鑑綱目卷二十六

